



LE GOUVERNEMENT
DU GRAND-DUCHÉ DE LUXEMBOURG
Ministère des Affaires étrangères
et européennes

Le Ministre de la Défense

Luxembourg, le

14 JUIN 2018

Dossier suivi par:
Alex RIECHERT
Tél.: 247-82840
E-mail: alex.riechert@mae.etat.lu



Monsieur le Ministre
aux Relations avec le Parlement
p.a. Service Central de Législation

L-2450 LUXEMBOURG

n. réf.: A37.724.18

Objet : Question parlementaire n°3814

Monsieur le Ministre,

J'ai l'honneur de vous transmettre ci-joint la réponse à la question parlementaire reprise sous rubrique.

Je vous prie de croire, Monsieur le Ministre, à l'expression de mes sentiments très distingués.

Le Vice-Premier Ministre,
Ministre de la Défense,


Étienne SCHNEIDER

**Réponse de Monsieur le Ministre de la Défense à la question No 3814 du 14 mai 2018 de
l'honorable Député Fernand Kartheiser**

Zur 1. Fro:

De Fuerpark an d'Equipementer déi d'Armée huet, setze sech aus Ween a Material zesummen, déi eng ënnerschiddlech Unzuel vun Déngschtjoren erof hunn. Déi Equipementer sinn awer operationell an asazfäeg, wann een elo vun deenen Ausfäll ofgesäit, déi wéinst logistesche Grënn onëmgängelech sinn (Astandsetzen, periodeschen Ënnerhalt, Feele vun Ersatzstécker, asw.)

Déi verschidde Gamme vu Ween an Equipementer erméiglechen der Armée, den Asaz vum Material de spezifischen Ufuerderunge vun de jeeweilege Missiounen an/oder eise Partner an dësen Missiounen entspriechend unzepassen.

Esou huet sech duerch operationell Consideratiounen erginn, dass de Reconnaissance-Peloton deen un der Missioun eFP (*Enhanced Forward Presence*) vu September bis Dezember 2018 a Litauen deelhält, mat gepanzerten HUMMER-Jeepen deployéiert.

Mir sinn desweideren am éischten Semester 2018 am EUBG (*EU Battlegroup*) a vu Januar 2019 un an der VJTF (*Very High Readiness Joint Task Force*) am Stand-by. A béide Fäll sinn dobäi Reconnaissance-Contingenten vun der Lëtzebuerger Armée engagéiert, déi mat PRV (*Protected Reconnaissance Vehicle*), alias DINGO, ausgerëscht sinn. D'Zréckgräifen op den DINGO erméiglecht et, fir an deene verschiddenen operationelle Kontexter während engem EUBG- oder VJTF-Deployement optimal equipéiert ze sinn. An deem Kader ass och ze erwänen dass mer fir eist VJTF-Engagement verschidde nei Acquisitiounen gemaach hu fir bestoend Equipementer ze vervollstännegen oder ze erneieren.

Zur 2. Fro:

Am Kader vum EUBG 2018 si 9 DINGOen am Asaz. Fir d'VJTF 2019 (déi awer schonns 2018 an der Stand-up-Trainingsphas ass) sinn am Ganzen 21 DINGOen am Gebrauch.

D'Nieft sinn awer och DINGOen fir Trainingszwecker an den Unitéiten affektéiert, dorënner och d'Fahrschoul.

De Moment läit den Operationalitéits-Taux vun den DINGO-Ween ëm déi 45%. Dat ass dorop zeréckzeféieren dass déi héich sophistiquéiert Waffesystemer, déi ee grouss Bestanddeel vum Won ausmaachen, engem opwenneg Maintenanceprogramm nokomme mussen an zousätzlech, an der Tëschenzäit, verschiddenen Obsolescencen ausgesat sinn. Dat heescht dass verschidde Komponente vun de PRV-Waffesystemer net méi vun den Hersteller ënnerstëtzt ginn, mat dem Resultat dass d'Armée keng Ersatzstécker fir dat betreffend Material geliwwert kritt.

Deemno schaffe mir un der Modernisatioun (mid-life upgrade) vun den DINGOen, fir se op de leschten equipments- a sécherheetstechnesche Stand ze bréngen. Dofir hu mer bei der NSPA (NATO Support and Procurement Agency mat Sëtz zu Capellen) a beim Constructeur eng "pre-design"-Etude an Opdrag ginn a loossen e Cahier des charges ausschaffen. Am éischten Semester 2019 kann den Opdrag fir d'Modernisatioun vun de Ween ulafen, sou dass mer vun 2023 un e moderniséierten DINGO-Park hätten. En dozougehéierende Service-Kontrakt (e sougenannte "Service Level Agreement") garantéiert, eng permanent Operationalitéit

vun op d'mannst 70%. Während der Entwicklungsphas gëtt och e Prototyp entwéckelt, deem et erlaabt virun der Serieproduktioun sécherzestellen, dass onse militäreschen Ufuerderungen och Rechnung gedroen gouf.

Zur 3. Fro:

Fir dem Hauptproblem vun der Obsolescence aus dem Wee ze goen, wäerten sech an Zukunft d'Acquisitiounen oder Modernisatiounen vum Charroi a multinational Programmer aschreiwen. Esou kënne mer eis Uschafungen an Aklank bréngen mat gréissere Partnernatiounen, wat de Virdeel huet, dass mer eng ëmmer besser Interoperabilitéit kréien an op d'logistesche Ënnerstëtzung vun de Partnernatiounen oder vun internationalen Agencen (z.B. NSPA) zeréckgräife kënnen. Esou multinational Programmer hunn och de Virdeel, dass dat selwecht Material a grousser Stéckzuel (ëm déi 3.000 Ween) a verschiddene Länner benotzt gëtt an dofir garantéiert d'Industrie, dass déi Equipementer iwwert eng länger Zäit (mindestens bis 2035) technesch ënnerstëtzt ginn.

Desweidert wäerte mer an Zukunft bei enger neier Uschafung och direkt ee „Service Level Agreement“ mat virgesinn, sou dass mer eng Garantie vun der Industrie hunn, dass eng am Virfeld fixéiert minimal Operationalitéit agehale gëtt.